

Inatsisartut ataatsimiittarfissaannik, allaffissornikkut sullissiviit ilanngullugit, nutaamik sananissamik 2013-imi novembarimi tunngaviusumik isummernerup Inatsisartunit ilalerneqarnissaanik Inatsisartut aalajangiiffigisassaattut siunnersuut

(Suleriaatsimut Ataatsimiititaliaq)

Akissuteqaat

(Naalakkersuisut Siulittaasuat)

1. Siullermeerneqarnera

Suleriaatsimut Ataatsimiititaliap aalajangiiffigisassatut siunnersuutaa saqqummiunneqartoq innersuussutigalugu Naalakkersuisut oqaaseqaatissatik naatsunnguannorlugit saqqummiunniarpaat neriuutigalugu akissutigineqartoq Inatsisartut aalajangiiffigisassatut siunnersuummik suliaqarnerminni atorsinnaassagaat.

Aalajangiiffigisassatut siunnersuummut saqqummiunneqartumut tunngatillugu Naalakkersuisut ikiorsiisariaqarnissaat Inatsisartut kissaatigippassuk soorunami Naalakkersuisut taamaaliussapput.

Naalakkersuisut maluginiarsimavaat inatsisartut ataatsimiittarfissaannik nutaamik sanaartornissamut tunngavilersuutigineqartut maanna siunissamilu politikerit pitsaanerusementik atugassaqartinneqarnissaat kiisalu Inatsisartut allaffinnilu sulisut atugaasa pitsaanerulersinneqarnissaannik kissaateqartoqartoq taamalu oqartussaqaatigiinnitsinnut pitsaanerusementik sinaakkutissalerneqarnissarput.

Tamatuma saniatigut eqqortussarlu anguniarlugu Naalakkersuisunit oqaatigineqassaaq sanaartornissamut aningaasartuutissat aamma Illuut A/S aqutigalugu taarsigassarsinissat Namminersorlutik Oqartussat ukiunut aggersunut missingersuutaanut akiitsunullu naatsorsuutaannut soorunami ilanngunneqartariaqassammata taamaasillutillu aningaasartuutissat taarsigassarsiassanullu nutaanut sinaakkusiussassanut Inatsisartunit akuerineqartussanut ilanngunneqartussaassallutik.

Aalajangiiffigisassatut siunnersuummi tunngavilersuutitut oqaatigineqarpoq suliniut sanaartugassanut aningaasaateqarfimmut ilaaterneqarsimasoq. Tassunga tunngatillugu ilisimatitsissutigisinnaavara Inatsisartut ataatsimiittarfissaannut 2013-imi 3 mio. kr.-nik aningaasaliisoqarnikummat. Taakkunanga 1,5 mio. kr.-t suli atorneqarsimangitsut Sanaartugassanut Iluarsartuusassanullu Aningaasaateqarfimmi suli uninngasuutigineqarput.

Taamatut oqaaseqarlunga aalajangiiffigisassatut siunnersuut Inatsisartunit oqallisigisassanngorlugi ingerlateqqippara.